



UPA15/31
16. april
Naaja H. Nathanielsen

Inuiaqatigiit kissaataat tunngavigalugit nunap ilaani aatsitassarsiorfissanik inerisaaviusussanik pilersitsinissaq aammalu nunap ilaani allani avatangiisit, ilorrisimaarneq, inuussutissarsiutit pioreersut assigisaalluunniit tunngavigalugit aatsitassarsiorfigineqarusunngitsunik pilersitsinissaq pillugu oqallisissiamik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Oqallisissiaq innuttaasunik, soqutigisaqatigiinnik aalajangiisartunillu peqataatitsinikkut amerlasuunit akuuffigineqartumik oqallinnissamut toqqammaviusaaq. Oqallisissiaq 2016-imi upernaakkut ataatsimiinnissaq nallertinnagu naammassineqareersimassaaq.

(Inuit Ataqatigiit Inatsisartunut ilaasortaataat)

Amerlasuujulluta aatsitassiornissamut, uuliasiorluni qillerinissanut imaluunniit pinngortitap immikkut illersorneqarnissaanut "angernissatsinnut" imaluunniit "naaggaarnissatsinnut" ersarissumik akiuminaatsitsisarpugut. Akissummi nunap ilaata sorliup pineqarnera apeqqutaasarpoq. Aatsitassarsiornermi ingerlassat ilaat tamattaalluta tapersersortarpagut – ilaannili isumammatt assigiinngissitaartarput. Tamanna aamma pinngortitap immikkut illersorneqarnissaanut atuuppoq. Sumiiffiit ilaasa immikkut qajannaateqarnerat isumaqatigiissutigisinnaasarparput – sumiiffiilli allat isumaqatigiinngissutigisarlugit.

Inuit Ataqatigiinniit nunap ilaani sorlorni qanoq ittunik inuussutissarsiutinik ingerlatsisoqarsinnaaneranut, aammalu sumiiffinnut sorlernut minnerusumik annerusumilluunniit qajaginninnissamut inuiaqatigiinni ammasumik oqallinnissaq pingaartipparput.

Siunnersuut manna aatsitassarsiornermi inerteqqutitut isigineqassanngilaq. Taamaallaalliuna oqallissaarummik inuiaqatigiinnilu oqallinnissamik noqqaasugut. Taava oqallittoqareerpat nunap ilaani sumiiffiit sorliit immikkut qajagisatut toqqassanerlugit naliliisinnaanngussaagut. Tamannalu tapersersorneqarpat aalajangiineq tamanna Inatsisartuni pissaaq.

Amerlanerussuteqartut siunnersuut manna itigartissagaat ilisimavarput. Taamaattorli inuussutissarsiutitigit ineriartortitsinissaq pillugu, innuttaasut peqataatinneqarnerunissaannut ammanerunissamullu annertunerusumik oqallitsiserusuttuusut oqariartortitaattut siunnersuutip matuma saqqummiuteqqinnissaa qinersimavarput. Oqallinneq manna soqutaanngitsuunngilaq pingaaruteqartuullunili.

Tassani aalajangeeqataanissaq pineqarpoq. Nunatta qanoq atorneqarnissaanut aalajangiinernut innuttaasut sunniuteqarsinnaanerisa nukittorsarneqarnissaat anguniarlugulu kissaatigaarput. Inuit Ataqatigiinniit pisuussutitta atorneqarneqarnissaat tamakkiisumik tapersersorparput. Aalisarneq, takornariaqarneq aatsitassarsiornerlu ingerlanneqanngikkaluarpata nunatta karsia imassaaleqissagaluarpoq.

Taamaakkaluarpallu innuttaasunut toqqissisimanermik atugarissaarnermillu neqerooruteqarsinnaassanngikkaluarpuqut. Taamaattumik Inuit Ataqaatigiinniit inuussutissarsiutitigut ineriartortitsinermik illersuisuuvugut. Isumaqarpugullu nunap ilaanut, zonenut, immikkuullarissunut oqallisigininnissaq inuussutissarsiorterup ineriartorneranut nukittorsaasuuginnassasoq.

Naalakkersuisut aatsitassarsiornikkut ineriartortitsinissami tamanna killiliisuussasoralugu ernummateqarput. Tamanna siunnersuummut matumunnga paatsoorneruvoq. Zonenik pilersitsinissaq siunnersuutigingilarput – zonenuku pillugit oqallinnissamik siunnersuuteqartugut. Ujaasinerit unitsinneqarnissaannik siunnersuuteqanngilagut. Nalunngilarput nunatsinni sumiiffiit amerlanerit aatsitassarsiortifigineqarsinnaasuusut. Sumiiffinnillu qajannaatilinnik imaluunniit aalisarnermut, takornariaqarnermut aatsitassarsiorterup nunalerinermullu pingaarutilinnik nuna ilaqarpat paasissutissat taakkua pingaaruteqartuupput. Sumiiffiit ilaanni inuussutissarsiutit ingerlassat marluk ataatsimoortikkuminaappata, tamanna paasissutissat pingaaruteqarpoq. Sumiiffiit ilaanni pinngartitaq immikkut qajannaateqarsimappat, tamanna paasissutissat pingaaruteqarpoq.

Siunnersuutitsigut innuttaasut isummaminnik anitsisinnaarannut periarfissikkusuppagut. Soorunami tamanna paasisanik tunngaveqassaaq – taamaattumillu Naalakkersuisut oqallisissiamik sanaqqullugit qinnuigaagut. Tassa siunnersuutitta qitia.

Naalakkersuisut ingerlatseqatigiiffiit nunami maani ingerlassaqarusunnerannik killileerusunngillat. Soorunami. Inuit Ataqaatigiinniilli isumaqanngilagut aalisartut, savaatillit, takornariaqarnermik suliallit inuussuutissarsiutillu allat tusarnaarnerisigut inuussutissarsiutitigut ineriartortitsineq sanngiillisinneqassasoq, najugaqarfimminniuna pisuussutit qanoq atorneqarnissaannut isummaminnik anitserusuinnarput piumasaqaateqarusullutillu.

Taamatut oqaaseqarluta Inuit Ataqaatigiinniit siunnersuutip matuma Inatsisartut Inuussutissarsiorterup Ataatsimiititaliaanit suliareqqinneqarnissaa inassutigaarput.